

IONA

Outeur : **Iona**
Aan : **Israeliete**
Rede : **Oor hulle**
Geskryf tussen : **780-722**
geskiedenis.

Voorwoord.

Die Iona verskil van die ander profetiese boeke in dié opsig dat dit 'n verhaal is van wat met 'n profeet gebeur wat Aleim se opdrag verontagsaam het. Iona moes die oordeel van IEUE oor Neneve, die hoofstad van Assirië gaan aankondig. Na 'n reeks buitengewone gebeurtenisse het Iona tog onwillig gehoorsaam, maar hy was baie ontevrede to Aleim Hom tog oor Niveve ontferm het.

Iona se Roeping, Ongehoorsaamheid en Straf.

- 1 En die woord van IEUE het gekom tot Iona, die seun van Amittai, en gesê:
- 2 Maak jou klaar, gaan heen na die groot stad Ninevé en preek daarteen, want hulle boosheid het opgestyg voor my aangesig.
- 3 Maar Iona het hom klaargemaak om na Tarsis te vlug, van die aangesig van IEUE af weg; en hy het na Jafo afgegaan en 'n skip gevind wat na Tarsis sou vaar. En hy het die reisgeld daarvoor betaal en daarin geklim om saam met hulle na Tarsis te vaar, van die aangesig van IEUE af weg.
- 4 Maar IEUE het 'n sterk wind op die see gewerp, en toe daar 'n groot storm op die see ontstaan, het die skip gevaar geloop om skipbreuk te ly.
- 5 Toe word die seeliede bang—hulle het elkeen tot sy god geroep en die lading wat in die skip was, in die see gegooi om vir hulle verligting aan te bring. Maar Iona het na die onderste dele van die skip afgeklim en daar gaan lê en vas aan die slaap geraak.
- 6 Daarop kom die skeepskaptein na hom toe aan en sê vir hom: Wat makeer jou dat jy so vas slaap? Staan op, roep tot jou Aleim! Miskien sal dié Aleim aan ons dink, sodat ons nie vergaan nie.
- 7 Hulle sê toe vir mekaar: Kom en laat ons loot; dan sal ons weet om wie se ontwil hierdie ramp

ons getref het. En hulle het geloot, en die lot het op Iona geval.

- 8 En hulle sê vir hom: Vertel ons tog om wie se ontwil hierdie ramp ons getref het? Wat is jou nering? En waar kom jy vandaan? Wat is jou geboorteland, en uit watter volk is jy?
- 9 En hy antwoord hulle: Ek is 'n Hebreër, en ek vrees IEUE, die Aleim van die hemel, wat die see en die droë land gemaak het.
- 10 Toe word die manne baie bang en sê vir hom: Wat het jy nou gedoen! Want die manne het geweet dat hy van die aangesig van IEUE af wegvlug; want hy het hulle dit te kenne gegee.
- 11 Verder sê hulle vir hom: Wat moet ons met jou doen, sodat die see om ons heen kan bedaar?—want die see het hoe langer hoe onstuimiger geword.
- 12 En hy antwoord hulle: Neem my en gooi my in die see; dan sal die see om julle heen bedaar; want ek weet dat om my ontwil hierdie groot storm oor julle gekom het.
- 13 Nogtans het die manne geroei om die skip weer land toe te bring; maar hulle kon nie, omdat die see hoe langer hoe onstuimiger teen hulle geword het.
- 14 Toe roep hulle tot IEUE en sê: Ag, IEUE, laat ons tog nie vergaan weens die lewe van hierdie man nie, en bring geen onskuldige bloed oor ons nie; want U, IEUE, het gedoen na u welbehag.
- 15 En hulle het Iona geneem en hom in die see gegooi. En die see het stil geword van sy onstuimigheid.
- 16 Toe het die manne IEUE gevrees met 'n groot vrees en 'n slagoffer aan IEUE gebring en geloftes gedoen.
- 17 En IEUE het 'n groot vis beskik om Iona in te sluk; en Iona was drie dae en drie nagte in die ingewande van die vis.

Iona se Gebed en Verlossing.

- 2 En Iona het tot IEUE sy Aleim gebid uit die ingewande van die vis
- 2 en gesê:

Uit my benoudheid het ek IEUE aangeroep, en Hy het my verhoor; uit die binneste van die doderyk het ek geroep om hulp—U het my stem gehoor.

- 3 U tog het my in die diepte gewerp, in die hart van die see, sodat 'n stroom my omring het; al u bare en u golwe het oor my heengegaan.
- 4 Toe het ek gesê: Ek is weggestoot, weg van u oë; tog sal ek weer u heilige tempel aanskou.
- 5 Waters het my omring tot aan die siel toe, die vloed was rondom my; seegras was om my hoof gedraai.
- 6 Ek het afgedaal tot by die grondslae van die berge, die grendels van die aarde het my vir altyd ingesluit; maar U het my lewe uit die kuil opgetrek, IEUE my Aleim!
- 7 Toe my siel in my versmag het, het ek aan IEUE gedink; en my gebed het tot by U gekom in u heilige tempel.
- 8 Die wat nietige afgode vereer, verlaat die Een wat vir hulle goedertieren is.
- 9 Ek daarenteen sal aan U offer met 'n stem van lof; wat ek beloof het, sal ek betaal. Die heil behoort aan IEUE.
- 10 Daarop het IEUE die vis beveel om Iona op die droë grond uit te spuur.

Nineve kom tot Bkering.

- 3 En die woord van IEUE het vir die tweede maal tot Iona gekom en gesê:
- 2 Maak jou klaar, gaan heen na die groot stad Ninevé, en verkondig daar die boodskap wat Ek jou sal sê.
- 3 Toe maak Iona hom klaar en gaan na Ninevé volgens die woord van IEUE. En Ninevé was 'n ontsaglike groot stad, drie daagse reis te voet.
- 4 En Iona het begin met een daagse reis ver die stad in te gaan en het gepreek en gesê: Nog veertig dae, dan word Ninevé verwoes.
- 5 En die manne van Ninevé het Aleim geglo en 'n vasdag uitgeroep, en groot en klein het hulle met rougewaad bekleed.
- 6 En toe die berig die koning van Ninevé bereik, het hy opgestaan van sy troon en sy mantel afgehaal en in rougewaad gehuld in die as gaan sit.
- 7 En hy het in Ninevé laat uitroep en sê:

- Op las van die koning en sy groot manne—geen mens of dier, beeste of kleinvee mag aan iets proe nie, hulle mag nie wei of water drink nie;
- 8 maar mens en dier moet 'n rougewaad om hê, en hulle moet ernstig tot Aleim roep, en elkeen moet hom van sy verkeerde weg bekeer en van die onreg wat aan sy hande kleef.
- 9 Wie weet of Aleim nie sal omkeer en berou sal hê nie, sodat Hy Hom afwend van die gloed van sy toorn en ons nie vergaan nie?
- 10 En Aleim het hulle werke gesien dat hulle hul bekeer het van hulle verkeerde weg; toe het Aleim berou gehad oor die onheil wat Hy gesê het dat Hy hulle sou aandoen, en Hy het dit nie gedoen nie.

Aleim se Bestraffing aan Iona.

- 4 Maar Iona was hieroor erg ontstemd, en hy het kwaad geword.
- 2 Toe bid hy tot IEUE en sê: Ag, IEUE, het ek dit nie gedink terwyl ek nog in my land was nie? Daarom het ek tevore na Tarsis gevlug; want ek het geweet dat U 'n genadige en barmhartige Aleim is, lankmoedig en groot van goedertierenheid, en Een wat berou het oor die onheil.
- 3 o IEUE, neem dan nou tog my siel van my weg, want dit is vir my beter om te sterwe as om te lewe.
- 4 Daarop sê IEUE: Het jy rede om vertoornd te wees?
- 5 En Iona het die stad verlaat en aan die oostekant van die stad gaan sit. Daar maak hy toe vir hom 'n skerm, en hy gaan daaronder in die skaduwee sit, totdat hy sou sien wat met die stad gebeur.
- 6 Toe beskik IEUE Aleim 'n wonderboom en laat dit oor Iona opskiet om te dien as skaduwee oor sy hoof, om hom van sy ontstemdheid te bevry; en Iona was baie bly oor die wonderboom.
- 7 Maar Aleim het die volgende môre toe die dag breek, 'n wurm beskik; en dié het die wonderboom gestek, sodat dit verdor het.
- 8 En met sonop het Aleim 'n gloeiende oostewind beskik; en toe die son op die hoof van Iona steek, het hy magteloos geword en gewens dat

hy mag sterwe, en gesê: Dit is vir my beter om te sterwe as om te lewe.

- 9 Toe sê Aleim vir Iona: Het jy rede om vertoornd te wees oor die wonderboom? En hy antwoord: Ek het rede om vertoornd te wees tot die dood toe.
- 10 Verder sê IEUE: Jy wil die wonderboom spaar waar jy geen arbeid aan bestee het nie en wat jy nie grootgemaak het nie, wat in een nag ontstaan en in een nag vergaan het.
- 11 Maar Ek mag Ninevé, die groot stad, nie spaar nie waarin meer as honderd en twintig duisend mense is wat die onderskeid tussen hulle regter— en hulle linkerhand nie weet nie, en baie vee?